



# Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimyim@gmail.com

TAPAK 8

Yangia anidakangma :



Tir Yimyim



tiryimyim@aolima



tir yimyim

TAPAK 7



## IWF World Cup: Bindirani Devi-i Bronze medal angu

## Senegal ato kiloneser mapa abentsü Ousmane Sonko shimogo



VOL. XXI ISSUE NO. 171 (ADOK 171) DIMAPUR YANGTEPNÜ (THURSDAY) RONGCHII (APRIL) 04, 2024 ₹ 5.00

## Nagaland sorkari "paid holiday" sangoktsür

**Kohima, April 3, 2024 (DIPR):** Nagaland sorkari April 19 nü Lok Sabha election atema polling anogo "paid holiday" ta metetdaksüogo. Sorkar/nija aser shishilembadaker ajaker ajak iba anogo "paid holiday" asütsü aser vote enoktsüba maparen nung shilem agitsü ta Nagaland Home Department-i ashi. Representation of the People Act, 1951 nung Section 135B nung lateta aliba ama April 19 nü Lok Sabha elections polling

anogoji mapa inyaker ajak atema "paid holiday" asütsü ta parnokki ashi. Ajisüaka, mapai maoba ajanga lendong mesüra takoksa angutsüsa mapa inyaker tembo iba nung madener, ta Home Department-isa ashi. Maneni, Negotiable Instruments Act, 1881 (Act, XXVI) kübok Nagaland nung banks aser financial institutions nung mapa inyaka ajak atema polling anogoji paid holiday asütsü ta parnokki metetdaksü.

## Ketdangsürtem, candidate aser political party tem senden amen



April 3, 2024 nü Commissioner & RO, 1-Nagaland Parliamentary Constituency Sushil Kumar Patel IAS den Election Observers teloki candidates aser political parties den senden ka amenba angur. (DIPR)

## Eastern Nagaland nung Congress-i election nung shilem magitsü

**Dimapur, April 3, 2024 (Agencies):** Eastern Nagaland nung Congress party unit temi Chenmoho bangzüng pusemba metetdaksüogo. Eastern Nagaland People's Organisation (ENPO)-i ketdangsüa Chenmoho bangzüng renema lir. Ministry of Home Affairs (MHA)-i Frontier Nagaland Territory (FNT) atema teinyaktsü shitak meinyak tashi Eastern Nagaland nung alirtemi central aser state elections nung shilem magitsü Bharatiya Janata Party (BJP) sorkar aiben tiyazü tenangzükbaterm agia aruba aser National Democratic Alliance (NDA) lennirtemi mapang atsülangtsü merangba aitsür, ta Eastern Nagaland nung Congress units-i metetdaksüogo. ENPO aser kin lennirtemi den külemi Eastern Nagaland nung

Congress units-i central aser state elections nung shilem magitsü lemtetba osang metetdaksü. Külen, ENPO-ia April 6, 2024 anepdang 10:00 ako nung KU Hall, Mon nung senden ka amentsü jatepogo. **Eastern Naga ketdangsürtem den senden amentsü** Eastern Nagaland nung election mokdangtsü ayongzüka aliba mapang ka Nagaland sorkari Eastern Nagaland Gazetted Officers Association aser tanga tongti sorkar ketdangsürtem den senden ka amentsü jatepogo. Chief Minister Rio lenisüba kübok State Cabinet-i April 4, 2024 nikongdang 3:00 ako nung ENGOA den senden amentsü jatepogo. Iba senden ya Chief Minister's Residential Complex nung Conference Hall nung amentsü.

**Kohima, April 3, 2024 (DIPR):** Nagaland nung election tiptema agitsü atema election ketdangsürtemi April 3, 2024 nü candidates aser political parties den senden ka menogo. Commissioner & Returning Officer 1-Nagaland Parliamentary Constituency Sushil Kumar Patel IAS-i anir Election Observers telok kati iba senden ya amen.

Senden nung General Observers Avinash Champawat IAS aser P. Ramesh IAS, Police Observer Suresh Kumar Jain IPS aser Expenditure Observers Vivek Chauhan IRS o Satya Batra IRAS nunger aden. Iba mapang Postal Ballots amshiyim, election dak sendakba mapa asoshi garitem amshiba aser democratic inyakyim nung shilem agitsü indang onüktem

lemsatsep. Election ketdangsürtemm, candidate tem, political party balala aser nübertemi election tiptema agitsü merangtsüla aser code of conduct sülen anidakttsüla ta senden nung jembitep. Senden nungsa candidate tem aser political party nungi teshimtet nübotemi parnok tebilembatem lemsatsep aser onük kar jangjashitepa liasü.

## Arunachal nung Congress aser BJP aitsüteper

**Itanagar, April 3, 2024 (Agencies):** Nübertemi BJP kanga sapuba ajanga Congress candidate aikati nomination meyipa agi ta Arunachal Pradesh Chief Minister Pema Khandu-i Bodbarnü ashi. Arunachal Pradesh nung BJP-i terenlok mapa jenti inyakogoji aser maneni tejakleni anir aotsü ta nübertemi kuli nguogoji ta CM Khandu-i ashi. "Congress-i tim mesüi yimsü asüba aser junga ketdang masüba atema nübertemi Congress senzükogoji. BJP-i sen politics kodanga meinyaker aser Congress candidate shinga memesük. BJP-i dang state nung terenlok bener arutsü ta angatetba agi Congress candidate temi tenüng meyipa agi" ta paisa ashi. "Arunachal Pradesh nung ruling BJP-i assembly elections nung takok angutsü atema Congress candidate tem alizük" ta Arunachal Pradesh Congress

Committee (APCC) president Nabam Tuki-i Mongulbarnü ashi. BJP-i sen aika agütsüba yong Congress party candidate aikati nomination papers meyipa agi ta Tuki-isa ashi. Arunachal Pradesh assembly election atema BJP candidates 60, Congress 19, National People's Party (NPP) 20, Nationalist Congress Party (NCP) 14, People's Party of Arunachal (PPA) 11, Arunachal Democratic Party 4 aser Lok Jana Shakti Party (LJSP) candidate 1 lir. Arunachal Pradesh nung April 19, 2024 nü Lok Sabha constituency 2- Arunachal West aser Arunachal East atema elections den külemi assembly election agitsü. Arunachal Pradesh nung Assembly constituency 50 atema candidate 133 lir. Züngsem 60 agi akümba assembly nung BJP-i menden 10 nung tetokteper shinga melii takok nguogoji.

## WW-II nung teboui jajaba bilemteta British tsür kati jajaogoji



British tsür Charlotte Carty-i aniba telok Kohima War Cemetery tonga aruba sülen agiba noksa angur.

**Kohima, April 3, 2024 (TYO):** World War II nung ghonda 39 jajaba ama Kohima Education Trust nung Trustee Charlotte Carty lenisüba kübok nisung 26-i Jessami nungi Kohima tashi jajaogoji. World War II nung Charlotte tebou Lt Col 'Bruno' Brown-i ghonda 39 jajaba bilemteta iba sentong agiogoji. Lt Col 'Bruno' Brown ya CO 1st Assam Regiment, Battle of Kohima 1944 nungi liasü aser WW-II sülen küm 80 buba nung par semchir Charlotte-i tebou bilemteta jajaogoji. Chakhesang Public Organization (CPO)-i March 31 nü Phek yimdak Charlotte Carty aser lai telok pelashishia agizüka liasü. MLA aser Leader NPF legislature Party Kuzholuzo (Azo) Nienu-i sentong nung

jembi. Carty-i aniba British nunger teloki April 1 nungi Jessami (Manipur) nungi jajatsü tenzük. Parnoki Lozaphuhu, Losami, Chizami, Losatephe, Pfütsero, Kikruma, Kezo Town, Chedema adenba sülen Bodbarnü Kohima WWII Cemetery tonga aru. Carty'er teloki kilometre 124 jajaogoji. Parnok Kohima tonga arudang Kohima Village Youth Organisation (KVYO)-i D.Khel Kohima village nung pamok pelaa agizük aser Kohima war cemetery tashi mein. War Cemetery nung Kohima Educational Trust-i ainertem pelaa agizükba sentong ka agidang Charlotte Carty-i tesüba bilemtetsü aser benjungtsü atema iba mapa inyakba osang lemsatsep.

"Aonung junga memejangi aser anisüngzük shitak magii jajatsüba ya kanga tasak liasü. Oboula aser par regiment-i iba dang nung tamajungba kangshir alitsü südi kechiyong parnokki jaja metenzükdanga anogo aika khatapa liasü" ta laisa ashi. Laisa lanuputu dang tesüba bilemtetsü aser asenok aliba tobur tajung alima akhümtsübuttsü ayongzük. Charlotte Carty den pa kinungbo aser tanur asem dena parnok ajak agi nisung 26 liasü. Parnok rongnung nisung 20 tashi World War II nung shilem agirtem nungi jakzükertem lir, ta Carty-isa ashi. Brihostibarnü British nunger teloki WW-II cemetery nung Battle of Kohima sülen küm 80 buba ajungba bilemteta sentong ka agitsü.

### FAC Mokokchung nung Cultural Exchange sentong ka tenzükogo



**Dimapur, Rongchii/April 03 (TYO):** Fazl Ali College, Mokokchung ajanga Sherubtse College, Royal University of Bhutan den lungjemer Cultural Exchange Programme 2024: Strengthening Bonds, Celebrating Diversity sentong ka April 3, 2024 nü tenzükogo aser April 5, 2024 tashi alitsü.

Iba sentong mezüing anogo indang omen ya "Cultural Odyssey: Discovering Diversity, Forging Friendships" liasü.

Mezüing session tenzükaga L. S. Vinod Kumar, Vice-Principal, Fazl Ali College ajanga jembidang Sherubtse College nungi delegates tem pela agizük

aser tajanzük lia sensaksem akatsü yongya ataba lemsatapa liasü.

Iba sülen Dr. E. Benrithung Patton, Assistant Professor, Department of Political Science ajanga sentong tarensen lemsatap aser institution balala tsüingta teti shisa lemsatapa aser tesendaktep tajung alitsü tejangraba ashi.

Kelzang Namgay, Lecturer, Department of Arts and Humanities, Coordinator to the Cultural Unit, Sherubtse College ajanga Bhutan nungger sobaliba indang tongmelang agi rateta ashi aser Fazl Ali College den lungjemer

opportunity tasen bushia angzüksü atema maangka anguba atema pelaba lemsatapa liasü.

Iba sentong nung Sherubtse College ajanga "Boedra: Traditional Bhutanese Dance" agi shilem agi aser FASCU ajanga "Waro Rang" ken agi shilem agia liasü.

Iba sülen T. Senka Ao, Padmashree Awardee ajanga "Cultural Workshop at Ketsangriju: An Indigenous Skills Training Centre" atema tetushi agüja liasü aser FAC Hostel Committee ajanga "Hostel Campfire Nite" ayongzükaga anogo tembang.

### NSDMA ajanga nüburtem dang tekumdangtsü metetdaksü

**Dimapur, Rongchii/April 03 (TYO):** Nagaland State Disaster Management Authority, Home Department ajanga IMD, Regional Office Guwahati den osangtsüsang agitepa aruya aliba anogotem asoshi tzüingsang-mopung takzüba metetdaksüogogo.

State nung tzüinglu tesashi den yipru aser mopung (ghonda ka nung kilometre 30-40) maneni aontsü imlar. Item tzüinglu den külemi tsüingi, rer tsükba aser yipru tesashi amala pre-Monsoon activities tem April 16, 2024 tashi alitsü imlar, ta NSDMA ajanga ashi.

Peren, Dimapur, Kohima, Phek, Wokha, Zunheboto, Kiphire, Mokokchung, Shamator, Tseminyu aser Tuensang district tem nung mepet sübanga tzüinglu sashia aruba den mopung tesashi aonba aser tsüingi-tzüingperet alitsü. Maximum temperature ya 31 degree Celsius asütsü aser kasa mapang tenemlen minimum temperature ya 11 degree Celsius tashi alutsü ta ashi.

Iba mapang tzüinglu tanen makai aruba ajanga tenük agi junga majitettsü aser traffic tsütsü timtem ajurutsü aser lenmang nung tzü atsüingba mesüra süngdong laoba ajanga traffic nung tetsükdaksü ajurutsü, ta NSDMA sangdong ajanga ashi.

Sera ki aser azü ki raksatsü, tsüinglu sashia aruba aser anentsüh aluba ajanga ki o jen raksatsü, aser aonsotsü anojungi raksatsütsü. Yipru aitba aser tsüingi aiba mapang kilung nung jenoka alitsüla, ta ashi.

Nüngdakba mapang traffic

advisories sülen anidaksüla, tashi mait ki o jen nungi pila alitsüla aser tzüinglu sashia arutsü ama takzütetra alu nung tzü aoba lenmang sadema yutsütsüla.

Aonsotsü wazükaga ayutsü mera tem agütsüla, tzüingsang majungba mapang kimai maotsüla, talisa alu, shiruru chiyimdaksüba, ango apuba, rong nung senzüba mesüra senzüsempang masütsüla.

Tsüingmok amokdang kilung nung alitsüla, yinsang-yinre aser yinjung agi yangluba ki anasa mali tajungba. Safe shelters nungya ki, office, shopping centres, aser hard-top vehicles tem lir.

Anasa ki malidak nai item timtem ajurura, tekeraba nung tenem bushia aotsüla.

Teladak tesem nung lia item tzüingsang-mopung ajurura, tekeraba nung lendong nungi na pila alitsüla.

Nü tekong tesülen kou moronga keraa aitra, tsüingi aitsü tejangja ta nai metettsüla. Idangjisa na aliba tesem nungi ainshia awatsüing, tzütu aser tzü aliba tesemtem bushia aotsüla, ta ashi.

Utility lines aser electricity aliba (telephone, power, metal fences, overhead wire, rail-road tracks, wind mills, süngdong aser tenem kolak) nungi pila alitsüla.

Rubber sole aliba tsüingsem aser gari tyre temi tsüingi nungi mekumzükger, na arem nung lira süngdong tila aser süngdong rajang nung jenoktsüla, ta ashi.

Electric mesüra telephone poles mesüra süngdongzüng nung mejenoktsüla. Itemji ajanga tsüingi atsü. Yin agi yangluba osettsüset mamshitsüla aser

bikes, electric/ telephone poles aser wire fence nungi pila alitsüla.

Na moabu/kima mapa inyaka lira aser tesem tajung nung jenoktsü mapang melira, koktena mejanger teka agi tenarong atangtsüla aser akok tashi ali nung metangshitsüla.

Tzüingi aiba mapang kodanga mobile phone tamshi.

Computers, laptops, game systems aser washers ama electrical/electronic appliance agizükaga ayutsüla.

Dryers, stoves mesüra electrical outlet nung sendaktepa aliba oset agizükaga ayutsüla, kechiaser tsüingi aiba mapang main power supply nung power tesashiba akumtsü akok.

Tanur aser kiset shiruru kilung nung yutsütsüla, mopung agi onshitsü akokba süngpak mesüra danga janatem indoktsüla, ta ashi.

Tsüingi atsütsüsa aliba bicycles, motorcycles mesüra alu nung amshiba gari nungi pila liang. Rong nung mena mesüra tzü waa lira, akok tashi tekong bushiang. Yipru aruba mapang teyarir maru tashi mesüra yipru mesüyi tashi gari telung nung liang, gari indang window tem shibangtsüla aser gari ya süngdong mesüra power lines nungi pilar anena ayutsüla.

Lendong nungi pila alitsü mechi nüburtem dang kumdanga alitsü ajungshir, ta NSDMA, Home Department ajanga ashi.

NSDMA ajangasa District Disaster Management Authorities aser danga line departments ajunga dang saksalema alitsü ayongzükger, ta sangdong ajangasa ashi.

### DC & DEO Mokokchung ajanga requisitioned vehicles atema metetdaksü

**Dimapur, Rongchii/April 03 (TYO):** Lok Sabha Election 2024 agitsü atema Mokokchung district kübok requisition süa aliba gari ajak April 16, 2024 anepdang 10:00 ako nungi tenzükaga Imkongmeren Sports Complex nung adenshitsu Deputy Commissioner &

District Election Officer, Mokokchung, Thsuvisie Phoji ajanga sangdong ka nung metetdaksüogogo.

Iba totuyuba sülen manidakertem dak Representative of Peoples Act 1951 kübok tapet mera agitsü, ta sangdong ajangasa ashi.

### Mokokchung nung Polling Personnel atema 2nd Phase training agitsü

**Dimapur, Rongchii/April 03 (TYO):** 18 Lok Sabha atema 2024 General Elections asoshi Mokokchung district kübok polling personnel atema 2nd Phase Training ya April 5 & 6, 2024 anogotem agitsü, ta DC & DEO Mokokchung, Thsuvisie Phoji-i sangdong ka nung metetdaksü.

Mayangnokcha GHSS, Mokokchung nung agitsü.

Maneni Election duty certificate angütsü atema polling personnel ajaki Form 12A den EPIC Card/Service ID Card photocopy ka-ka agütsütsüla. First Phase training nung Election duty ID Card atema passport noksa ana-na magütsü alirtemi agütsütsüla.

April 5, 2024 nü Presiding Officers (tebur aser tetsür) atema training ya anepdang 9:30 ako nungi Mayangnokcha GHSS nung agitsü aser First Polling Officers (tetsür aser tebur) atema kasa tesem nung anüingdang 12:00 ako nungi tenzüktsü.

Departmental Nodal Officers temi pei department nung requisition süa aliba ketdangsurtem dang iba training indang metetdaksütsüla.

April 6, 2024 nü Second aser Third Polling Officers (tetsür aser tebur) atema training ya anepdang 10:00 ako nungi

Training nung madener nem Representation of the People Act, 1951 indang Section 134 nung mela aliba ama tapet temerenshi agütsütsü, ta sangdong ajangasa ashi.

### Chümoukedima nung Webcast Nodal Officers & Master Trainers training agi

**Dimapur, Rongchii/April 03 (TYO):** Lok Sabha atema General Election agitsü aliba mechi April 3, 2024 nü Deputy Commissioner, Chümoukedima indang Conference Hall nung Webcast Nodal Officers aser Master Trainers atema training agüja liasü.

atema agia amshiyim, connection indang sayu.

Real time nung message shidak agütsütsü mechi iba training ya agüja liasü.

Iba training ya Nagaland nung aliba district ajak atema online aser offline webcasting

District ajak nung teyari ama koda masüba mapang District Assistant aser District Manager ajanga yaritsü, ta ashi.

Iba training nung shisalen sayur ya Chotelal Bhagat, Vmukti Solutions Pvt. Ltd liasü.

### Kohima nung Absentee voters atema metetdaksü

**Dimapur, Rongchii/April 03 (TYO):** Absentee voters (AVSC-85 yrs aser tema, AVPD & AVCO) shirnoki Postal ballot ajanga vote agütsütsü shimtet aser temsüa ali, parnoki pei vote ya April 9 & 10, 2024 anogotem agütsütettsü, ta Deputy Commissioner & District Election Officer, Kohima, Kumar Rammikant IAS ajanga sangdong ka nung metetdaksüogogo.

Assembly Constituency nung Polling Station number 3,4,5,26,28, 24 awajemtsü, Maneni 8 Western Angami AC kübok Polling Station number 1,2,7,9,11,12,13,15,17,18,19,22,23,25,29 (AVPD-1,18 & 23) awajemtsü.

Door to door casting aser Postal Ballot bendenba maparen ya Polling Teams ajanga Micro-Observer aser Videographer den külemi April 9, 2024 anepdang 8:00 ako nungi nikongdang 4:00 ako (First visit) tashi alitsü.

9 Kohima Town AC kübok Polling station number 2,4,5,6, 7,8,23,35 (AVPD-2,5,6,7,35) awajemtsü.

Ajisüaka Polling Team temi first visit mapang voter(s) aliba tesem mongutetra, polling team temi April 10, 2024 nü tanaben semdangtsü. Anungji Political Parties ajaki aser candidate temi kuli atema pei Polling station shia representatives tem item anogo nung yoktsü metetdaksür, ta sangdong ajanga ashi.

14 Southern Angami -I AC nung Polling Station number 14,15 (AVPD-14,15) aser 9 Kohima Town AC kübok Polling Station number 14,15,16,19, 20,21,22,24 (AVPD-14,24) awajemtsü. 10 Northern Angami -I AC kübok Polling station number 1,2, 19, 22, 27 aser 9,10,11, 12,13,14, 15,16, 17,1 8, 20,26 (AVPD-17,20) awajemtsü.

11 Northern Angami -II AC nung Polling Station numbers 1,8,9,18,25,28,30 (AVPD-8,25) aser Polling Station number 16,17,19,20 awajemtsü.

14 Southern Angami -I AC nung Polling Stations number 1,2,4,5,6 (AVPD-1,2,6) aser Polling Station number 9,10,11,12,20 (AVPD-9,11,12) awajemtsü.

8 Western Angami



April 03, 2024 nü New Delhi nung Tihar jail kima AAP lenirtem aser züngsemtemi party lenir, Sanjay Singh atadang tangokba noksa nung angur. Delhi excise policy ken o dak sendakba nung Supreme Court-i pa nem bail agütsüogo.

### Telangana nung Pharma company ka nung nisung pezü pokset

New Delhi, April 03 (Agencies): Bodhbar i anir oa yaridar," ta metetdaksü.

Telangana state kübok Sangareddy district nung aliba pharma company ka nung reactor apokba lendong nung nisung pezü asü aser nisung ter dak tali yiruogo, ta police-i metetdaksü.

Osangbener den jembidang sorkar ketdangser kati, "Pharma company nungji reactor apokba ajanga iba tesem anasa alir kar asü aser kar yiru. Tang tashi nung nisung pezü süogo aser

Telangana Chief Minister, Revanth Reddy-i ketdangsertem dang tekaraba nung nisungtem kümzüksü aser mi enseptsü tuyu. Paise ketdangsertem dang yirua alirtem tajungtiba nung yaritsü tuyuogo.

### India-i UNSC nung permanent seat angutsü: EAM Jaishankar

New Delhi, Metsüremi/April 03 (Agencies): External affairs Minister S Jaishankar-i, India-i United Nations Security Council (UNSC) nung permanent seat angutsü, ajisüaka kanga meranga inyaksüsa akümtsü, ta metetdaksü.

Paise, alima nung linük aikati UNSC nung India züngsem daksüner saka iba nükjidong ataloktsü atema asenoki kanga meranga inyaksüsa akümtsü, ta ashi.

Jaishankar-isa küm 80 shia tejaklen UN tentetba mapang nung linük pongu- China, France, Russian Federation, United Kingdom aser United States-i parnok saka UN Security Council nung permanent züngsem akümba metetdaksü.

Iba mapang nungji alima

nung linük 50 shi dang liasü saka tangbo alima nung linük 193 shi kümogo, ta pai ashi.

"Ajisüaka item linük pongu jagi ajak azüoker, aser temelenshi atema parnok dang asüngdangtsüji tasak. Kari melunger, kari ochishishia parnok tangatetba lemsaper aser kari tesülen nungi langka kar inyaker. Yamaji küm aika ataloker," ta pai ashi.

"Ajisüaka linük aikati (UNSC nung) temelenshi alitsüla ta bilemer aser India nem permanent set agütsütsüla ta bilemer," ta pai ashi.

"Asenoki mendenji angutsü. Ajisüaka meranga meinyak nungbo kecha majangzükteter. Asenoki kanga meranga inyaksüla, tang nungi ano kanga temerangba inyaksüla," ta pai ashi.

Jaishankar-i, India, Japan,

Germany aser Egypt linüktemia longjemmer UN matsüngdang temelenshi atema benokogo, ta metetdaksü.

"UN tashi meiti kümogo ta aikati bilemer. Ukraine rara dak sendaka nung UN nung kecha mesüetet aser Gaza nung rara dak sendakba nunga UN nung telemetba kecha magitet. Iba ama tensa ka nung asenok permanent seat angutsüsa maongka tuluba akümer," ta pai ashi.

Ano tanga olen ka nung pai, "Coronavirus wara ajanga rongsenkettzüng ainba tsütsü tetsükdaksü aliyonga India nunger rongsenkettzüng shilem 7 ainba ajanga alimai süngmanger. India ya rongsenkettzüng tekeraba ainba linük ka ama India ya alima rongsenkettzüng ainba gol ka ama alimai repranger," ta ashi.

### Mallikarjun Kharge-i 'Ghar Ghar Guarantee' mapatong tenzüksüogo

New Delhi, April 03 (Agencies): Bodhbarnü Congress Tir, Mallikarjun Kharge-i 'Ghar Ghar Guarantee' tenzüksüogo; iba mapatong kübok party-i linük nung kibong crore aika sema nüburtem nem party tenangzüka pongu-

"Panch Nyay Pachees Guarantees" metetdaksütsü. Iba mapatong tenzüksüodang Kharge-i, "Nüburtem nem "Panch Nyay Pachees Guarantee" metetdaksütsü

atema onoki iba guarantee card alemtsü. Congress lenirtem aser party nung inyakerktemi kibong aika sema iba card agütsütsü aser teloktep sorkari tarutsü nung teinyaksü balala nüburtem nem metetdaksütsü," ta ashi.

Congress-i Lok Sabha election atema April 5 nü party manifesto sayatsü, iba sülen April 6 nü Jaipur aser Hyderabad na nung lokti senden tulu ayongzüka agitsü.



April 03, 2024 nü Bijapur district nung security sepaitemi khasetba Maoists telungpurtem tasü mang noksa nung angur. Bodhbarnü sepaitemi Maoists telungpur 13 khasetogo.

### Sushil Kumar Modi cancer agi shiranger; election nung metokteptsü

New Delhi, April 03 (Agencies): Bodhbarnü BJP lenir aser taoba mapang Bihar Deputy Chief Minister, Sushil Kumar Modi-i, pa tesüiba ita trok tashi cancer tashidak agi shiranga arudar, anungji pai taruba Lok Sabha elections nung metokteptsü, ta metetdaksü.

Pai X ajanga, "Tesüiba ita trok tashi ni cancer tashidak den raraa arudar. Nüburtem dang ibaji sangdongtsü mapang tongogo ta ni bilem. Lok Sabha elections nung ni kecha masütsü. Ni Ato kilonser danga

ajakji shiogo. Linük, Bihar aser party dang pelar," ta metetdaksü.

Taküm February ita nung BJP-i Rajya Sabha election atema Bihar nungi party candidate tem sangdongba mapang nung Sushil Modi tenüngbo maliasü.

Sushil Kumar Modi ya Bihar nung küm 11 tashi deputy chief minister inyaka liasü. Sushil Kumar Modi ya Bihar nung Finance Minister-a inyakogo.

Bihar nung Lok Sabha menden 40 atema April 19 nungi

June 1 tashi nung shilem tenet lemsar election agitsü aser June 4 nü election agiba osang sangdongtsü.

Pai iba osang sangdongba sülen Bihar deputy chief minister, Vijay Kumar Sinha-i, "Taoba mapang Bihar Deputy Chief Minister aser BJP lenir tain, Sushil Kumar Modi temang mejungi aliba osang angashia aoksar. Pai ajangshibatem nungi ni ama party nung inyaker aika tajangzüik angutsü atema pa tekeraba nung taneptsü angutsü atema ni sarasademtsür," ta lemsatetp.

### Rajiv Gandhi tepsetba ken o nung aitsür asem Sri Lanka-i yokogo

New Delhi, April 03 (Agencies): Taoba mapang Ato kilonser, Rajiv Gandhi tepsetba ken o nung aija alir nisung asem- Muguran, Robert aser Jayakumar nunger Bodhbarnü Chennai airport nungi tayimtsü ajanga Sri Lanka-i yokogo.

2022 küm November ita nung Supreme Court-i iba ken o nung aija tepuokdak alir nisung tenet chiok aser parnok rongnung par asem-a densema liasü. Parnok chiokba sülen parnok pezü Tiruchirappalli nung aliba special camp ka nung liasü.

Mongolbar aonung parnok Chennai tonga aru aser Bodbarnep tayimtsü ajanga Sri Lanka yimtiba, Colombo-i apusoa ao.

Tamalen Tamil Nadu state sorkari Madras High Court dang, Foreigners Regional Registration Office (FRRO)-i parnok nem deportation order agütsüba sülen parnok pei limai



April 03, 2024 nü Wayanad district nung Congress lenir, Rahul Gandhi-i Lok Sabha election nung tokteptsü atema nomination file asüi aodang tangokba noksa nung angur. Kasa noksa nung Priyanka Gandhi aser K.C. Venugopal na densema party lenirtem angur.



## TIR YIMYIM YIMOBILEM (EDITORIAL)

DIMAPUR YANGTEPNÜ, APRIL (RONGCHII) 04, 2024

### I.N.D.I.A. bloc atema mapang petdakra

- P Tiamongba Aier

**M**arch 31, 2024 nü Delhi nung I.N.D.I.A. bloc rally ka ayonga agiba ajanga Opposition campaign indang tereprangtsü tera sayuogo. Ramlila Maidan nung agiba sentong nung political party 10 tema adenshia liasü. Aam Aadmi Party, Congress, Trinamool Congress (TMC), Jharkhand Mukti Morcha, Dravida Munnetra Kazhagam, Shiv Sena-UBT aser Communist telok balala nungi lennirtemi BJP-i aniba sorkar aitsüogo. BJP-i Opposition ajembangtsü meranger anungji Election Commission of India (ECI) tiyongtsüi aittsüla ta INDIA bloc lennirtemi takhangba agütsüogo. Central agencies-i Opposition lennirtem dak tenük yoka mapa inyakba aser Opposition party tem senotsü tsütsü timtemdaksüba anendakjang ta I.N.D.I.A. bloc-isa ECI dang mepishogo. Parnokisa taoba Jharkhand Chief Minister Hemant Soren aser Delhi Chief Minister Arvind Kejriwal na chioktsü takhangba agütsüba den BJP-i election funds tim mesüi amshiba atema Supreme Court-i bushisügang asütsü takhangba agütsüogo. BJP tsügang democracy lendongbang nung lir aser BJP-i agency balala amshia Opposition timtemdaksür ta o jembir ajaki ashi. Kejriwal kinungtsü Sunita aser Hemant Soren kinungtsü Kalpana nati anir Opposition lennirtemi tesentepertem ayongzüka jembi aser I.N.D.I.A. bloc-i ayongba Loktantra Bachao Rally ya takok ka ama repranger. Ajisüaka politics ya tema tereprangtsü dang masü. Opposition-i ashiba onüktem ya democracy atema kanga tongtipang lir aser olemteptsüla, saka I.N.D.I.A. bloc ket nung mapang peria mali ama bilemer. Parnoki public den tebilemstütem lemsateptsü aser ruling party-i ochimashi inyakba den central agency balala azüokba kulitem agütsütsü asoshi mapang kanga petdakra. Külen I.N.D.I.A. bloc sasep nunga mepetmesü lir aser iba ajanga parnok menden lemsatepba nung timtem ajurutsü. Talisa parnok joint campaigns aser common programme ka renemtsü atema inyakyim tenzüka mali. Delhi rally nung TMC lennir kati TMC ya I.N.D.I.A. bloc nung liasü, lir aser maneni alitsü ta ashi. Ajisüaka külen Mamata Banerjee-ibo West Bengal nung Congress-Left teloktepi BJP atema inyaker ta sangoktsüogo. I.N.D.I.A. bloc-i Ramlila Maidan rally tulu ayonga agiaka state sasep nung parnok melongjemtetra BJP atsügangdoktsü alizüngji metongtettsü ama bilemer. Kasa anogo, Meerut nung BJP rally ka nung Prime Minister Narendra Modi-i Opposition den meranga tokteptsü jangjangja metetdaksüogo. Opposition longjemba ya kibong ajanga yimsü asürtem kümzüksü atema lir ta PM Modi-isa aitsüogo. Lok Sabha 2024 ya telok ana tsüngda rara lir- kati (NDA) ochimashi tera nung atsüdoktsü meranger aser kati (I.N.D.I.A. bloc) ochimashirtem kümzüksü meranger ta paisa ashi. PM Modi-isa Lord Rama teyari meshia election campaign tenzüko aser pai aniba sorkar wadang balala nung terenlok bener aruba sayur. Tesüiba küm ter tsüngda Narendra Modi-i aniba NDA sorkari kanga dang meranga mapa aika inyaka aruogo aser India nung par nütsüng aika yimtetogo. Anungji I.N.D.I.A. bloc-i küm ter inyaka aruba ruling party aser sorkar ka atsügangdoktsüi kanga tasak asütsü aser talisa ibaji mapang agia mashir. Kechiyong I.N.D.I.A. bloc ya yaküm tentet saka mapa kecha balaka inyakba mangu aser parnok sasep nung mepetmesü aser obang meputep onüktem atema inyaka arudang Lok Sabha elections tongdaksüogo. Anungji mapang kanga petdakra ama ajitetba agi I.N.D.I.A. bloc-i 2024 sülen general elections dak ang ranglok tajungba asütsü asü ta bilemer saka politics nung kechi ang ajurutsü mesüra kechi ataloktsü shingala meshitet nungji June 4, 2024 anogo nung jiang asenoki osang tejangja metettsü.

## OLEMSABANG

### Arogo-i tasü-ita ochi yimyim yimtsüla

~ L. Kika Pongener.

(Yashi adok nungi...)

Tesasatsüka, tanü asen yimden aser loktiliba ajunga ochimashi mapatem agi sunga lir. Kodang Election arudir yimden yimsusurtemi anir loktiliba ajunga nung tongti-lennirtem aser nubur ajungai ochishia pei temeden Vote agütsütsü melena, senyong pei temeden Vote ayoker. Arogo nung tenzükertema dena aikati pei Vote senyong ayokba angudang kanga-sa aoksar...!!! Sorkar-i yimtsüng/jila terenlok mapa inyaktsü nungdem nung agütsüba sen yimsusurtemi ochimashi ketdangsua amshiba angudang nuburtem temulong kanga amsar. Tip külen memetetba telok-tentet tapu-tapu nungi percentage (%) kati-kara talila meshiba agi terenlok mapa sadem-sadema meinyakteter. Ano shishilempartem dak Percentage (%) tali-tapong kati-karaba agi osettsüset nung jenjang tupet atur, aser idangji sensaker tilartem talila sensak tiai yidaktsür. Anungji item ochimashi mapatem anema arogo-i tasüita ola adoktsüla. Tsüngrem lartem aser arogo tenzükertemi nungsen metsübui tasü-ita ochimashi mapa aser teraksa anema ola adoktsüla.

Tesasatsüka, tanü India nunger temzüng-ozüng (Constitution) nung pei amangnuba yimsu amangtsü temeden agüja liaka, state aika nung Hindu nunger Khristan yimsu dangi meyipba tamanger aika tashiyim agi amokmerena Hindu yimsu dangi-sa tanaben khangshia meyipdaksüba angur. Tanü India lima state aika nung 'Anti conversion Law' bill passed asüba angur. India lima state aika nung Khristantem aser kin tilatem amokmerena mezüngmeshiba aser tepsetba angur. Tang yimsu tesudak sorkar-i tamang yimsu nung kanga tenük yoker ta asüba küli kaji...Hindu nunger 'Ram Temple' küm aika meyangluteti yua aliba tang sorkar-i ketdangsua/acha-ayanga iba 'Temple' yanglua renemer, Putir-i meshiteta lapok masü Prime Minister-baiang meshiteta lapokogo. Ano Indian temzüng nung 'Uniform Civil Code' benoka bill passed asütsü kanga merangdagi. Anungji arogoi item tashiyim mapatem anema tasü-ita ochi yimyim ayimtsüla. Ashiko, ibaji kodang mapa küma inyaka odir, tarutsü nungpo timtem tetsükdaksü ajurutsü amai tsüremseta bilemer.

Anungji tanü arogo-i ajem-ajema meli-i asen lima ochimashi, teraksa aser tashiyim agi alener yareta shirangba nungi nuji küma sala-a chioktsü atema tasü-ita yimjak nung ochi yimyim ayimtsüla. Sorkar inyakyim anema asüyongjia, tim masüba aser ochimashi mapatem anema-bo tasü-ita nunga ta shitettsüla. Yimden bangdak aser yimsusur-i arogo nung amuoka tashi amshiba, arogo remsepa yutsütsü merangba, Tsüngrem lartem aser Khristantem reshikangshia tepsetba, iba ama mapatem anema arogo-i tasü-ita ola adoktsüla. Atangji, arogo ya ochimashi aser tashiyim mapa anema tasü-ita nokdakba sabang ka sudaktsüdi.

Anungji, tang aruya-a aliba Election nung Khristan-temi shisa ka-a pei Vote agütsütsü arogo-i ajungshidi.

**Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir**

## England nung Khristan 200 dak temai temeshi aini oa mile 120 jaja



Walsingham tashi temeshi aini aoter telok ka tangokba noksa nung angur.

**April 03, 2023:** Temeshi hopta mapang nung England nung Khristan 280-i mile 120 tashi jaja Walsingham yim tashi temeshi aini ao.

England nung Khristantem atema temeshitiba tesemtem rongnung Norfolk kübok aliba Walsingham yim densema lir.

Temeshi aini aoter Khristan karibo tetsüng agi iba yim atongtsü atema anogo tenet tashi agia liasü.

Temeshi aini aoteremji Colchester, Epping Ely aser Kettering densema tesem 12 nungi apusoa lenmang balala ajanga jajaba sülen iba yim

atong.

Arrshi küm 60, Juliet Brien-i taküm-a temeshi aini aoba nungji shilem agi. La kaketshir asüba mapang aser arrshi küm 19 asüba mapang mezüng temeshi aini oa liasü. Iba mapang nungjagi tenzüka lai Temeshi hopta aser Easter mongpu nung temeshi aini aoba nung shilem agia arur.

Brien-i, "Temeshi aini aoba ajanga kü tanela kanga tetezü keta asentenshir," ta ashi.

Laisa, "Onok jajaba mapang nung Arogo balalai onok pelaa agizüker aser temeshi aini aoba tembanga

Good Friday anogo nung Walsingham yim atonger," ta ashi.

Akhi mapang nungi Walsingham yimdak Pilgrim Cross Catholic National Shrine aser Basilica of Our Lady ya Khristantem atema kanga temeshi tesem ama züngshir.

Temeshi aini aoteremji Tenla kitem nung anenzüka chiyunger aser anisüngzüker.

1948 küm mezüng Khristan tebur 30-i Temeshi hopta mapang nung London nungi Walsingham yim tashi temeshi aini oa liasü, aser takümbo Khristan 280-i shilem agiogo.

## ANOGO ABEN TSÜNGREM DEN

## Tabensa Temeyonger

*Pai asen Tebu Tsüngremi mulunga amato tang aliba alima tamajung nungi asenok kümzüksü asoshi asen temenen atema pei sasa agütsü. Galatia 1:4*

Temeyonger mapaji Lipok 3 nung angur, Adam aser Eva mangsa aliba nembangtsü asoshi shiruru ka tepsita iba teküp jagi tena temang mangsa aliba nembangtsü. Nisung temenen asoshi taküm bendanga agütsütsüsa aküm. Abrahama ayi rong nungi san ka agia Isak melen tenla agütsü. Süia aoba Benjung mezüng asoba jabaso melen san chanu asü, Khristai, Pa asüba ajanga item tatishitsü ajak ataloktsü.

Rom 5:6 nung temenen pur atema Khrista asü ta ajang ajanga ashir. Ibai Tsüngrem nungi pilar temenen nung alir ajak atema lir. Ni inyakba atema - temenen atema pai pa sasa agütsü. Ni kechi lir-temenen nisung-iba atema Pa asü.

Tsüngremi Pa agütsür: Pai temenen pur kümzüksü asoshi pei chir agütsü.

Aikati ashir, Tsüngremi asenok molumi nungi kümzük aser asenok sünetsü süa alitsü asoshi alima nung toktsü. Tsüngrem ochi o nungi talila kecha temloka aotsü mali. Khrista asen meyonger, asen menen aben aser asen meketa temenen aliba nungi kümzüksü ain agütsü.

Tanü lokti nung iba putu Tsüngrem yimsü asüba aser Khristai yimsü asüba anemer. Asen Kibubai temenen madak takok angubaji iba lima yimya madak takok anguba lir. Iba lima nung Khtista ain nung asenok lidaktsütsü Tsüngremi mulungba lir.

Khristai temeyonger mapa inyakbaji telatet maka jenjang agütsütsü makok. Pai ano Pa shia aruba taküm asenok nem agütsüba ajanga maneni takok ain agütsür. Alima temenen asoshi temeyonger teperi asenok kar-Khrista.

Oba, kü menen ajak temeyonger Khrista agütsüba asoshi ne tenüng asanger.

## NBCC-i general election atema ghonda 152 sarasadem inzü ayonger

**Dimapur, April 03, 2024 (TYO):** Nagaland Baptist Church Council (NBCC)-i taruba General election atema aser Khristantem tsüngda telongjem alitsü atema April 12 nungi tenzüka ghonda 152 tashi sarasadem inzü ayongzüker, ta NBCC General Secretary, Rev. Dr. Zelhoo Keyho-i sangdong ka ajanga metetdaksü.

Asen linük, talisa Nagaland nung 2024 General Election atema sarasademtsü ayongzüker.

"Nai kwiben tetsüngda/ongdang nung nokdaker? Tsüngrem matsüngdang ongdang nung nokdaksü kanga rongdak nüngdaka kümogo. Ongdang nung nokdakba ajanga Tsüngrem aser sarasademsang na tsüngda apu latsür. 152 zünya ya alakteta shimba zünya ka masü saka Nagaland nung Khristan yimsü arur küm 152 ajungba küm lir. Asenoki maneni sarasademtsü nüngdak," ta sangdong nung shia lir.

"Akhidangbo tsükchirtem dang nungi kümzüksü atema yimitem nung jara aser mitsa yanglua liasü. Yimitem meketa jara yanglu aser ibaji yimti nung aliba nüburttem

kümzüksü atema liasü. Tanübo asenoki asen yimitem meketa jara meyanglutettsü, kechiyong yimitem maneni tuluba dang akümer. Tanübo yimti jaraji lenmang aisü ajanga asen kija atema yanglutsüla. Ajisüaka asenok sarasadem ajanga asen yimitem, jilattem aser yimtsüngtem kümzüksü," ta kasa sangdong nung shia lir.

"Tanü putu nung loktiliba, region, linük aser alima nung temelenshi maneni aliba tensa mapang ka nung asenoki tuluka bilemstsüla, iba deniji külemi asenok kechi akümtsü ta asenoki süoki ia shisadangtsüla. Tesüba küm ter tsüngda tatalokbatem asenoki meteta dang lir aser lenla ajak nung asenok meketbangogo. Ibayongji asenoki asen linük aser state atema sarasademtsü nüngdaker," ta sangdong nung shia lir.

"North east region ya mainland India den tesendaktep mali ama asenoki bilemer. Kuli kar ajanga talisa Naga nungeri yamaji bilemer. Anüng kübok ajak atema mongpu ka lir, ta Laishiba nung shia lir. Loktiliba-yimtenren aser yimsü tsütsü

asen linük tensa koma asütsü, ta asenoki shisabulua bilemer. Asenok ano mongpu tasen kati ayaoka air, aser iba ya mapang kobika alitsüar asenoki memetet. Asen linük ya koma asütsü ta jembir. Bilembaji atangji ataloktsüa akok mesüra olulu dang asütsüa akok. Kechi südir süaka asenok ajaki shisabulua bilemer. Asenoki shimba lenirtemi linük atema mapatong balala benoktsü aser taruba küm pongu yimsütsü. Ibaji ajanga linük, region, state, nüburttem, kibongtem, yimsü dak sendakba organizations aser Arogotem kongshitsü," ta sangdong nung shia lir.

"Tang asenoki taruba election atema sarasademba mapang nung asenoki Tsüngrem dang nungi teyari nüngdaker. Onoki ayongzüker sarasadem ya yimtenren party ka tenüng teta sarasademtsütsü atema masü. Asen sarasademji nija kar anema masü, ajisüaka parnoki linük atema tajung inyaksü asoshi Tsüngremi parnok den jembitsü atema sarasademtsüla. Linük tejakleni anitsüpur lenirtem shimtetsüsa Tsüngremi mapa inyakang ta sarasademtsü.

Senso ajak kasa züngshitsü aser tamangba yimsü temeden agüja senso ajak kümzüka sadoksadoka litettsü atema asenoki sarasademtsüla," ta sangdong nung shia lir.

"Asenok ya kodamasüba nüburttem kümdar. Asenok teimla samaogo saka iba nungjagi adoktetsüsa asenok tashi itta mali. Election agiba shia asenok tarokba-tarokba nung asonger. Joko kecha mali. Asenok ket nung alibaji tamang dang lir, anungji asenok tamang akasotsüla. Asenok tamang ulushia sarasademtsüla. Tsüngrem Pa menden nung lir aser Pai yimsütsü. Asenoki tamang agi inyaksü Tsüngremi asenok atar. Asenoki apudaker teka mekanga longjemer sarasademdi. Tsüngremi mapa tulu inyaksü aser asen lima atema sayatenya inyaksü, ta amanga asenoki sarasademdi," ta sangdong nung shia lir.

"Tang ama tensa ka nung asenok ajak ani-belemogo, shisabulur aser tebilemstsü akar. Paul-i asenok dang temelung tadem ma, saka ajak nung sarasademba aser mepishiba aser tenüngsang agi nenoki mepishiba Tsüngrem

nem metetdakang." Filipi 4:6. Iba nung ya election tensa-a densema lir," ta sangdong nung shia lir.

"Asenok ajak shisabulur aser tebilemstsü akar, kechiyong joko tensa asenoki mazüokteter. Asen lima nung yimtenren tamajung aitadokogo. Ya asenok ajak tai ajanga lir. Asenoki tajung tilaka inyakba ajanga kecha mesüteter. Asenoki Tsüngrem teyari kanga nüngdaka kümogo," ta NBCC sangdong ajangasa metetdaksü.

"Asen yimsü beshiba ya amokmeren ka ama züngshir aser parnoki asenok samatsütsü aser ola madokdaksütsü atema inyaker. Asenoki anogo shia tasen aika ajangshir, asenok temlung ilaa akümer. Ajisüaka asenoki nokdaksüla. Asenoki Tsüngrem dak metaloktsüla. Asenoki asen linük aser state atema sarasademba mapang nung Tsüngrem dak metalokdi.

Asenoki sarasademdi. Asenoki Tsüngrem den sendaktepedi. Ongdang nungji nisung teimtiba nokdaker sarasademtsü nüngdak. Tsüngremi asenok dang taochi sayuang," ta kasa sangdong ajanga lemsatop.

OLONG PAITEP # 6746

Grid for OLONG PAITEP # 6746 with numbers 1-24 in various cells.

TIPIEN

- 1. Saku - (4)
6. Songjen - (7)
7. Mall/Tazung - (4)
9. Tasen apok - (6)
11. Songtem - (3)
13. Ata liasü - (5)
16. Tzüngludenkülemi tsüker - (3)
17. Aso tila - (6)
20. Tashi maküm - (4)
24. Tenüng kasa jatepba - (7)
25. Ki yangluba oset - (4)

LANGTSÜNGLEN

- 1. Taksep - (3)
2. Langtem - (5)
3. O tamendaktak - (4)
4. Nütsü tububa - (3)
5. Anüngdang tesangwa - (3)
6. Apitet - (5)
7. Yagi jungdaksür - (4)
8. Anogo semer ka - (3)
10. \_ \_ \_ tatsü - (3)
12. Tebur kidong aser zünga kasa tsüngda jatepba - (4)
14. Pela agizükba tapu ka - (5)
15. Tenüng atet - (3)
18. Mejanga onü - (5)
19. Talak techira - (4)
21. Maneni - (3)
22. Nübo teyi - (3)
23. Meshi - (3)

OLONG PAITEP # 6745 TELANGZÜBA

TIPIEN :

- 2. Pongsen, 5. Lepko, 7. Omen,
8. Maangka, 10. Yangkhu,
12. Senpong, 14. Angu,
15. Raksa, 16. Arameso,

LANGTSÜNGLEN :

- 1. Alimang, 2. Pongen,
3. Samaru, 4. Nün, 6. Pio,
9. Nüngdak, 10. Yongya,
11. Kongro, 13. Ora, 14. Ata.

NAI-A YA METETTER MA

ALIMA NUNG TAMBUTISANG SÜOGO



Alima nung tambutisang Juan Vicente Perez Mora April 2, 2024 nü süogo. 2022 nung Guinness World Records-i Venezuela nunger Juan Vicente ya alima nung tambutisang ta kuli agüja liasü. Arishi küm 114 nung Juan Vicente Perez Mora asüba osang Venezuela President Nicolas Maduro-i lemsatepa liasü.

February 4, 2022 nung Perez arishi küm 112 aser anogo 253 alidang alima nung tambutisang kuli agüja liasü. Par tanur 11 lir aser 2022 tashi nung par semchir ajak agi 71 liasü.

Perez ya Andean state kübok El Cobre nung May 27, 1909 nung aso.

Form titled 'Tepela Tasoba Anogo' with fields for name, school, class, and address.

BJP-i takok angutsü atema Congress candidate tem alizük: Nabam Tuki



Arunachal Pradesh Congress Committee (APCC) president Nabam Tuki-i April 2, 2024 nü Congress manifesto sayatsü dang agiba noksa angur.

Itanagar, April 3, 2024

(Agencies): Arunachal Pradesh nung BJP sorkari assembly election nung takok angutsü atema Congress candidate tem mesüzüker ta Arunachal Pradesh Congress Committee (APCC) president Nabam Tuki-i ashi.

BJP-i sen aika agütsüba sülen Congress candidate aikati nomination papers meyipa agi ta pai ashi.

Congress-i assembly menden 60 nung 34 atema candidate shim saka tang candidate 19 dang kümogo, ta Tuki-isa ashi.

Tuki-i Arunachal West parliamentary constituency nung Lok Sabha candidate ka ama tokteper aser APPC vice president Bosiram Siram-i

Eastern parliamentary constituency nung tokteper.

"Iba nung tesüngmangtsü kecha mali, BJP-i elections nung takok angutsü atema kanga meranger. BJP candidate temi ozü candidate tem sen agi alizüker" ta Tuki-isa metetdaksü.

Tuki ya Papum Pare district kübok Sagalee constituency nungi kümsük trokben tashi MLA inyakogo.

"BJP-i tasa atongaka Congress-i menden teimba nung takok angutsü. Ozü candidate-i toktepba menden 19 nung onoki takok angutsü" ta paisa metetdaksü.

Congress-i secularism nung amangba telok mashii ka den lokteptsü ta APCC president-isa ashi.

BJP den tetokteper malii

menden 10 nung takok anguba atema osangbeneri asüngdangdang "Arunachal Pradesh nung iba ya tang tasen masü. 2014 assembly elections nunga Congress-i menden 11 nung tetokteper mali takok ngua liasü" ta Tuli-i langzü.

Opposition INDIA bloc-i national level nung elections nung takok ngura state nung sorkar melentsü. Centre nung Congress sorkar arura Rajiv Gandhi Bhavan nung noktadkak tawa malitsü kechiyong BJP MLA ajaki Congress nung adentsü, ta paisa metetdaksü.

"State nung MLA aser minister ajak ya Congress nungi lir. Arunachal ya rongsen peria maliba state ka lir aser New Delhi nung dang metaloker alir" ta Tuki-isa ashi.

BJP-i Barak Valley nung LS menden anaprong takok angutsü

Guwahati, April 3, 2024

(Agencies): Assam Chief Minister Himanta Biswa Sarma-i Bodbarnü Silchar nung BJP candidate Parimal Suklabaidya meina ao.

Lok Sabha Election atema Parimal-i nomination asü dang CM Sarma-i meina liasü.

Bharatiya Janata Party (BJP) atema 2024 election ya kanga tezüba lir kechiyong Election Commission-i delimitation maparen inyakogo ta CM Sarma-i ashi.

"2019 election nung kanga tasak liasü saka Barak Valley nung ozü candidate temi takok

angu. Takümbo Delimitation ajanga kanga züba kümogo. Ajisiüaka onoki koma takok angutsü mejembir" ta paisa ashi.

Silchar sülen CM Sarma-i BJP state president Bhavesh Kalita den külemi Karimganj nung BJP candidate meina ao.

Ichamati ken o atema KSU züngsemtemi lungkak ait

Shillong, April 3, 2024

(Agencies): Khasi Students Union (KSU)-i Bodbarnü Sohra police station nung lungkak aitba sentong ka agiogo.

East Khasi Hills district kübok Ichamati nung aayanger na tepsetba dak sendakba nung KSU züngsem ana apuba anema parnoki lungkak ait.

Lungkak aitertemi KSU züngsemtem- Shanborlang Shati aser Mesadapbor Skhembill na chiochtsü atema takhangba agütsü.

KSU züngsemtem, kinungertem aser yimdaklirtem ajak meyokteper nisung 100 shi Sohra police station nung adenshi aser police-i pua aliba nisung ana chiochtsü takhangba agütsü.

Sohra police station nung lungkak aitba sülen KSU lennirtem aser ozüng amertem tsüngda senden ka amen.

Idangji KSU central body assistant general secretary Rueben Najjar-i mobile tower location data nung ajemdaker



züngsemtem maputsüla ta police dang ashi.

Iba tesem nung KSU züngsem aika liasü kechiyong March 27 nü KSU-i Ichamati nung Citizenship Amendment Act (CAA) anema lungkak aitba sentong ka ayongzüka agi ta Rueben Najjar-isa ashi.

Tower location data ajanga timi lungkak aitertem dak tai tongloktsütsü akok ta Najjar-isa ashi.

KSU züngsemtemi nisung ana tepset ta aitsüba magizüker kechiyong onok CAA anema lungkak aitba sülen senshiadok

aser iba tatalokba nung shilem kecha mali ta paisa metetdaksü.

Meghalaya police-i kanga dang aritepa ozü züngsemtem maitsü yimjak nung metetdaksüba aitsür kechiyong iba ajanga KSU tenüng menüchtsür aser kin o kin tsüngda meputep adokdaksür ta Najjar-isa ashi.

"Meghalaya police-i olemtepba mapang kanga mejungi jembishiniüogo. KSU-i bushisüngdang nung yaritepnür saka onoki akhangba magizükra iba anema mapa inyaktsü" ta Najjar-isa ashi.

# Taiwan nung menoknok tesashi anak, nisung 7 asü aika yiru



**Taipei, Rongchii/April 03 (Agencies):** Bodhbarnep Taiwan anüdoklen menoknok magnitude 7.4 anoka nisung tenet asü. Iba lendong nung nisung 736 yiruba jangjaogo aser iba menoknok ya pei sasa yimsü asüba asetkong nung küm 25 tsüngta tesashitiba alitsü.

Iba menoknok anakba sülen Taiwan aser southern Japan aser Philippines nung tsunami adoktsü tekum dangtsü sangdongogo.

TaiwanPlusNews ajanga ashiba agi, asürtem ya anentsüh alua anenbanga liasü.

Anepdang 8:00 ako atongtsü lia menoknok ya Taiwan south tsütsü Hualien City nungi kilometre 18 (mile 11) pilar ali telung kilometre 34.8 tarok nung tiyong sür anoka liasü, ta United States Geological Survey (USGS) ajanga ashir.

Ano Reuters ajanga osang ka nung ashiba agi, ki 26 laoba nung nisung 20 nembanger temai madokteti lir aser item ya tesadang ka dak tema Hualien nung lir. Menoknok agi kongshia aliba tesemtem nung nüburtem

kumzükba maparen maneni inyaker. Iba menoknok indang 'aftershocks' ya Taiwan yimtiba Taipei nung alirtemi meteta liasü. Tang tashinung aftershocks 25 aruba record süa lir ta Taiwan indang central weather administration ajanga ashi.

Nüburtem mapai aser school-i aoba mapang menoknok ya anak aser Hualien nung nisung aliba ki mangar aliba Taiwan television stations temi video nung sayuogo. Menoknok ya ali telunglen kilometre 15.5 (mile 9.6) tashinung anoka liasü ta Taiwan indang Central Weather Administration ajanga ashir.

Tsunami tzüsem kar south tsütsü Okinawa prefecture tonga liasü ta ashir. Mapang tatsüka lir tsunami warning agüja aliba ya tajemba kumja 'advisory' sangdong aser Richter Scale nung menoknok ya magnitude 7.7 liasü ta ashi.

Philippines Seismology Agency-ia province balala nung tzükum anasa alirtem dang

tekum dangtsü ashi aser tenemleni atutsü ajungshia liasü.

Taiwan nunga tsunami warning ka sangdong, saka iba nungi teraksatsüba meliasü aser Hawaii nung aliba Pacific Tsunami Warning Center ajanga teraksa bener arutsütsüsa tsunami tzüsem ya tangbo ajangogo ta shia liasü.

Iba menoknok ya China künok Shanghai, Fuzhou, Xiamen, Quanzhou aser Ningde yimitem nungia metet.

Kisüjensütsü asoshi ozüng tesashi amshiba aser disaster awareness agütsüba ajanga iba asetkong nung iba menoknok ajanga lendong tulu bener arutsütsü aliba nokdang, kong mapang shia menoknok tesashi agi kongshir. Anasa Japan nung küm shia menoknok 1,500 shi anoker.

Japan tzü-mopung takzür temi Miyakojima asetkong densema Japan south tsütsü asetkong aliba nung tsunami tzüsem ya metres asem tashi atutsü ta tekum dangtsü shia liasü.

# Senegal ato kiloneser mapa abentsü Ousmane Sonko shimogo

**Dakar, Rongchii/April 3 (Agencies):** Senegal indang Tir tasenbai iba anüolen aliba Africa linük indang Tir mapa agizükba sülen mezüngbuba Ato Kilonser mapa bendaktsütsü atema Ousmane Sonko shimogo.

Bassirou Diomaye Faye-i Mongolbarnü office mapa agizükba sülen mapang tatsüka dang lir iba osang ya metetdaksü aser taoba Tir aser yimden yimsüsüba tsütsü Sonko anemer Macky Sall lenisüba nung linük küm aika mepetmesü nung aruba tatongi melenshiyonga aotsü nangzükogo.

PM mapa abentsü shimba sülen Sonko-i ashiba agi, minister tem shimtsü atema temelaba agitsü asoshi pai Faye nem list ka agütsütsü.

"Iba khuret tulu abentsü atema pa (Faye) kija kechi südir süaka metoktsütsü," ta Sonko-i ashi.

Faye-i linük yimtiba Dakar anasa Diamniadio jila nung exhibition centre ka nung



ketdangsürtem noklang aika aser Africa linük balala nungi tekolaktem matsüngda Tir atema tenangzüktepba agia liasü.

Arishi küm 44 tain Faye ya taoba mapang election ajanga khen danga meshime liasü. Pa tepuokdak nungi chiokba sülen linük nung temelenshi bener arutsütsü tenangzükba nung election mezüngbuba round koka liasü.

Dakar nung amendaker aliba economist Lena Sene-i Al Jazeera dang ashiba agi, Tir ama Faye jakdang khuret tulu lir. "Nisung kati administration ajunga anogo ka nung memelenshidaktsütettsü. Ochi mashi inyakyim anema raratsü

atema inyakyim shitak benoka inyaktsüla ta pai angateta lir. Iba atema pa renema lir," ta lai ashi.

Küm ana tashi mepetmesü tulu adoker aliba mapang arishi küm 49 tain Sonko ya iba mepetmesü teyongtsü nung liasü.

Pa ya Senegal nunger lanurtemi kanga saklokba lenir ka lir saka pa defamation ken o ka nung aija March 24 nü Tir election nung tokteptsü atema tenokdangba agüja liasü aser iba sülen pa melena Faye shima liasü. Pai pa kecha nunga aibelena mali ta shiogo.

"Diomaye is Sonko," yimyim dak ajemdaker election atema nüboyimba mapang Sonko-i pa pusemertem dang Faye nem vote agütsütsü mepeshi, shibai election mezüngbuba round nung vote shilem 54 agi takok nguogo.

Faye, shiba taoba mapang tax inspector ka liasü, pa ya 1906 küm France nungi nüjiso anugba sülen Senegal indang pongububa tir kümogo.

# PHOM UNION, MOKOKCHUNG AJANGA SANGDONGER

Phom Union, Mokokchung ajanga sangdong ka yamai ayimoktsür. Mokokchung Town kübok Phom tsür/ Phom nunger tangar kidang yaritepertem mesüra kidang lia school/college azünger/training agirtem/mapa balala inyakerem kwika lir, parnok ajak Union nung tenüng zülüoktsü (registered asütsü) atema 6th April, 2024 (Saturday) nü, 12:00 noon nung Treasurer (Above Marvel Guest House, Alongmen Ward) ki bushia arutsü metetdaksür. Teküboklen agüja aliba nungdakbatem (details) bener arutsü mepishir.

1. Tenüng (Name)
2. Arishi küm (Age)
3. Tebu Tenüng & Yim (F/Name & Village)
4. Ki kibur tenüng/Yim/Add/Contact
5. Noksa ka
6. Registration Fee Rs. 200/- (rupees two hundred only)

Tenüng mezülöki tarutsü nung timtem/lendong ajurura, Union-i khuret mabentsü. Iba sangdong dak alaka kibong shia dangi osang balaka mayoktsü. Anungji, ajaki ibai tongtibang ta angateta tenüng zülüoktsü asoshi maneni nenshir.

Sd/-  
Nyamei Phom  
President  
Ph. No. 7005779432

Sd/-  
S. Chuba  
General Secretary  
Ph. No. 9612581032

# Gaza nung aid worker tepsetba atema IDF-i tatok meshi

**Tel Aviv, Rongchii/April 03 (Agencies):** Gaza nung aid worker tenet tepsetba atema Israeli Defence Forces (IDF) chief Herzi Halevi-i tatok meshia liasü. Parnok asüba ajanga linük aika jashidaktsü aser lenirtemi Israel aija liasü.

World Central Kitchen (WCK) ajanga ashiba agi, aid convoy ka tzü lenmanglen nungi Gaza-i nüburtem asoshi teyari chiyongtsü tons 100 dak tema bener arutsüba Deir al-Balah warehouse nung yutsür aoba mapang amak.

Halevi-i iba tesem amakba ya aibelen tulu liasü ta ashi. "Hombarnü atalokba ya aibelen tulu liasü. Ibai mataloktsüla asü. Meshidak jangjatepba liasü. Asaa masü WCK züngsem nem timtem agütsüba atema tatok meshir," ta Halevi-i ashi.

Aid worker tem asüba sülen

US Tir Joe Biden, UK Ato Kilonser Rishi Sunak, Australian aser Polish sorkari Israel aitsü.

WCK logo aliba convoy ya amakba tesem nung kilen poksar danga kari teraksa kar den meyoktepa lir ta ashir.

Gaza nung October ita rara tenzükba sülen WCK yagi pei ki yutsür tesem balala nung jenoka alirtem mesüa aru aser tzüyim ajanga teyari chiyongtsü bener arubatema nübur nem agütsüba nunga tongti shilem agia arur.

"Anogo tepiyong mission mapa inyaker meyipa shilangba mapang IDF-i amakdang tanüla tajung aliba par tenet tepset," ta WCK CEO Erin Gore-i ashi. Israel-i asaa aid workers dak tenük yoker amaker ta lai telok yagi taoba mapanga tai tonglokja arur.

(Maneni tapak 8 nung...)

# N.Korea-i hypersonic missile ka tendangogo

**Pyongyang, Rongchii/April 3 (Agencies):** North Korea-i ashiba agi, parnoki solid-fuelled hypersonic intermediate-range missile (IRBM) tasen ka tendangogo.

North Korea-i linük anütok tzüküm len missile ka tendangba South Korea aser Japan nati lazükba sülen anogo ka lir state meyong Korean Central News Agency (KCNA)-i Bodhbarnü iba osang ya metetdakja liasü.

KCNA-i, Hwasong-16B missile tendangba tesem nung lenir Kim Jong Un aser tang military lenirtem tangokba noksa ka lemsatapa liasü. Hopta ana tejakdang Kim-i achaayanga IRBM atema solid-fuel engine ka tendangba sülen tang iba missile ya tendangogo.

Iba hadir tendangba ajanga North Korea indang defence technology kanga kara renloka aoba sayur ta shia Kim-i tenüngsang agütsüogo. Pyongyang-i, range balala atema tactical, operational aser strategic missile tem asoshi nuclear-capable, solid-fuel systems yangluogo, ta pai ashiba KCNA sangdong ajangsa metetdaksü.

Tsükchir anema nokdaksü

atema North-i prangbong injang aser hadir balala maneni yangluyonga aotsü ta Kim-i tenangzükba agüja liasü. Pai Japan, South Korea aser United States ateshia iba olen ya lemsatapa liasü.

KCNA-i ashiba agi, Hwasong-16B ya anüngleni km 101 yima tur km 1000 shi yima ao. Seoul military-i ashiba agi, iba missile ya anüng nung km 600 shi yima aoba sülen South Korea aser Japan na yongtsüng nung tzüyim nung tsüka liasü.

North Korea-i, sophisticated solid-fuel weapons tali yanglutsü asoshi rangloker inyaksangshidar, kechiyong item hadirtem ya miimtsü aser belenshitsü temelaba aser tanga dang nungi takaraba yokteter. Liquid-propelled weapons tem nungbo meyok tsüngda totzü inoktsüsa akümer aser totzü inoker mapa talangkabo meyuteter.

Kasa mapang nung Hypersonic hadir tem ya sound idang speed dang nungi ponguben agi tekaraba aser teyimdak nunga anishiteter.

North Korea-i ashiba agi, parnoki hypersonic IRBM ka January ita tendangogo.

